

Chasa dals chantuns

Ils chantuns vulan dapli influenza a Berna

DA LUCAS DEPLAZES / ANR

■ **Cumbain ch'i sa tracta d'ina dumonda da muntada naziunala – sut la direcziun dal Departament federal d'economia – han ils directurs chantunals da l'educaziun publica envidà las medias a la conferenza da pressa davart il monitoring da furmaziun en lur chasa a Berna. Dapi l'onn 2008 disponan ils chantuns d'ina atgna sedia a la Speichergasse 6 a Berna.**

La «Chasa dals chantuns» munta in cler confess a la cooperaziun federativa dals 26 chantuns. Finamira da la nova instituziun chantunala a Berna è da crear en la chapitala svizra in ferm center da cumpetenzza per ils chantuns e da procurar per ina preschientscha communabla envers la confederaziun e las instituziuns privatas impurtantas. La nova instituziun en furma da fundaziun e sut il tetg da la «ch Fundaziun» duai lubir als chantuns d'accentuar meglier lur preschientscha e lur influenza sin la politica naziunala. La Chasa dals chantuns a Berna simbolisescha lur rolla e lur voluntad da cundecisiun e da cunresponsabladad davart las decisiuns politicas da muntada, che quai saja en l'intern u en dumondas internaziunalas. La paisa politica naziunala e ses success han ils chantuns demonstrà cun far il referendum (l'emprim referendum dals chantuns in summa) cunter il pachet da taglia l'onn 2001. Gronda influenza è sa manifestada tar la repartiziun dal retgav da l'aur or da las reservas da la Banca naziunala e tar la nova lescha davart la golvaziun da finanzas. Cun l'armonisaziun en il sector da scola sut il concordat «HarmoS» han els dentant stuè reconuscher ch'en Svizra cun sias quatter linguas e culturas na pon ins betg metter tut en il medem futgé.

Contact cun la chasa federala

Ils exponents da la Chasa dals chantuns



La nova «Chasa dals chantuns» a Berna.

FOTO L. DEPLAZES

tgiran in stretg contact cun las autoritads federalas. Aschia existan contacts regulars cun il cussegl federal e cun il cussegl dals stadis. Per intensivar ils contacts cun ils parlamentarists datti ina canorta parlamentara. La Chasa dals chantuns na saja betg da considerar sco concurrent dal cussegl dals stadis, punctuescha *Sandra Maissen* en discussiun cun l'Agentura da novitads rumantscha. D'ina vart lubescha la Chasa dals chantuns il dialog in-

terchantunal e da l'autra vart dat quella instituziun als chantuns la pussaivladad da far valair lur interess a Berna.

La Conferenza da las regenzas chantunals (cdc) vegn dirigida dal «Cussegl da fundaziun». En quest gremi è represchentà mintga chantun cun in commember guvernativ. Il comité directiv da nov persunas garantisce la lavur operativa en il senn d'ina suprastanza da la Conferenza da las regenzas chantunals (cdc).

In lung process

La Chasa dals chantuns è il resultat d'in lung process. Il basegn d'ina collavuraziun e coordinaziun pli stretga tranter ils chantuns è sa manifestada gia l'ultim tschientaner. Durant ils onns sessanta è vegnida creada la «ch Fundaziun per la collavuraziun federala». L'onn 2003 è la Conferenza dals las regenzas chantunals (cdc) sa dischlocada da Soloturn a Berna ed ha cumenzà cun la planisaziun d'ina atgna chasa. L'assemblea plenara dals 22 da zercladur 2007 ha acceptà las propostas per in agen domicil a Berna. Dapi la stad 2008 funcziunescha il secretariat – che stat sut la direcziun da Sandra Maissen – a la Speichergasse 6 a Berna. La nova fundaziun dals chantuns lubescha plinavant ina cooperaziun en ils secturs politics e technics e munta in far diever effizient da las resursas avant maun. La Chasa dals chantuns reuntescha indesch organisaziuns interchantunals che existevan gia avant, dentant repartidas sin divers domicils. En la Chasa dals chantuns a Berna lavuran 160 persunas, da quellas en 20 occupadas tar la «ch Fundaziun per la collavuraziun federala».

Tgi è domicilià en la Chasa dals chantuns?

En la Chasa dals chantuns lavuran ils secretariats da diversas conferenzas chantunals sco: La Conferenza da las regenzas chantunals, la Conferenza dals directurs da l'educaziun publica, la Conferenza dals directurs da finanzas, la Conferenza dals directurs da la sanadad publica, la Conferenza dals directurs da justia e polizia e la Conferenza dals directurs dals fatgs socials. Plinavant en sa domiciliadas era diversas instituziuns chantunals sco il center da prestaziuns per las scolaziuns, ils servetschs da prevenziun criminala e da pedagogia curativa.

Sandra Maissen dirigia ils secretariats

Sandra Maissen è burgaisa da Breil. Ella è naschida e creschida si a Cuira. Suentar la matura a Cuira ha ella absolvì ses studis a l'Universitad da Friburg e da Losanna. Ella ha doctorà ed acquistà il brevet d'avvocata a Turitg ed alura cuntinuà cun la furmaziun a la scola auta a Son Gagl ed er a l'exteriur. Plirs onns ha ella fatg experientschas professionalas tar PricewaterhouseCoopers a Turitg ed en ils Stadi Unids. Avant che surpigliar la direcziun dal secretariat è ella stada assistenta scientifica a l'institut per il federalissem a Friburg e secretaria generala da l'Espace Mittelland.

Dapi l'onn 2009 dirigia ella sco directura generala la «Conferenza da las regenzas chanunals (cdc) e sco directura la «ch Fundaziun per la collavuraziun federala» che è domiciliada a Soloturn.

